

元和郡縣志卷十二

唐 李吉甫 撰

河南道七

曹州 濟陰上

開元戶七萬三千一百六十一 鄉一百四十九  
案元和戶鄉數傳寫缺

禹貢豫州之域于周又為曹國之地後屬于宋左傳哀公八年宋景公滅曹按曹國在州東北三十七里濟陰縣界故定陶城是也七國時屬齊宋為楚魏所滅三分其地齊得其濟陰東平漢為濟陰郡之地在濟水之南

元和郡縣志

卷十二

一

故以為名漢景帝中六年別為濟陰國宣帝甘露二年更名定陶哀帝更為濟陰郡屬兗州後魏于定陶城置西兗州周武帝改西兗州為曹州取曹國為名也隋大業三年改為濟陰郡隋亂陷賊武德四年平孟海公復為曹州

州境 東西南北二百五十九里

八到 西至上都六千五百二十五里  
西至東都六千五百二十五里

東至兗州三百七十里  
東南至宋州一百五十里

西南至滑州二百四十五里  
西北至滑州二百四十五里

東北至鄆州三百三十里

貢賦

開元貢賦

蛇牀子  
綿絹

葶蔞

管縣六

濟陰

冤句

乘氏

成武

南華

考城

濟陰縣

緊郭下

本漢定陶縣之地屬濟陰郡隋開皇六年于此置濟陰縣屬曹州皇朝因之

曹南山在縣東二十里詩所謂薈兮蔚兮南山朝濟是也

元和郡縣志

卷十二

二

汜水在縣南昔漢高祖既定天下卽位于汜水之陽張晏曰汜水在濟陰界取其汎受弘大而潤下按今汜水縣東亦有高祖卽位壇據叔孫通傳云高祖爲皇帝通于定陶就其儀在濟陰是也

菏澤在縣東北九十里故定陶城東北其地有菏山故名其澤爲菏澤禹貢曰導菏澤被孟豬

州理中城蓋古之陶丘也一名左城帝王世紀舜陶于河濱卽禹貢之陶丘今濟陰定陶西有陶丘是也爾雅曰再成爲陶丘成猶重也

古曹國在縣東北四十七里故定陶是也定陶故城堯所居也堯先居唐後居陶故曰陶唐氏史記曰曹叔振鐸者周武王弟封于曹魯哀公八年宋滅曹執曹伯陽自曹叔至伯陽凡十八葉又范蠡相越平吳後變姓名爲朱公居于陶號陶朱公亦此地也

莘仲故城在縣東南三十里蓋古之莘國也伊尹耕于莘野湯聞其賢聘以爲相卽此地

三駸亭古國也在縣東北四十九里湯伐桀遂伐三駸俘厥寶玉注曰三駸國名今定陶是也

元和郡縣志

卷十二

三

冤句縣

緊東至州四十七里

本漢舊縣也漢初屬梁國景帝時屬濟陰郡隋開皇三年罷郡以縣屬曹州

煮棗故城在縣西北四十里漢書樊噲攻煮棗屠之是也

濟陽故城在縣西南五十里漢濟陽縣也光武以建平元年生于濟陽縣明照一室是歲有嘉禾生一莖九穗大于凡禾因名秀光武皇考爲濟陽合  
袁本初故城在縣北七十里袁紹所築

乘氏縣

緊南至州五十四里

本漢舊縣也屬濟陰郡隋開皇三年罷郡以縣屬曹州  
大業末年廢武德四年重置

孟海公南北二城在縣東四十五里隋末賊帥孟海公所築

成武縣

緊西至州一百里

本漢舊縣也屬山陽郡後漢改屬濟陰郡隋于此置戴  
州成武縣屬焉大業二年省戴州縣移理州城中後屬  
曹州武德五年于金鄉縣重置戴州縣又屬焉貞觀十

元和郡縣志

卷十二

四

七年廢戴州縣又屬曹州

故穉城在縣西北二十九里昭帝封金曰磾爲穉侯

南華縣

上東南至州一百一十里

本漢離狐縣也屬東郡舊傳初置縣在濮水南常爲神  
狐所穿穴遂移城濮水北胡曰離狐後漢屬濟陰郡魏  
志李典從太祖遷離狐太守然則魏時離狐郡也晉屬  
濟陰郡隋開皇三年罷郡縣屬曹州天寶元年改曰南  
華英公李勣左僕射彭城郡公劉晏皆此縣人

濮水在縣南五里昔殷紂使師延作靡靡之樂武王伐

紂師延至投濮水而死謂此水也

考城縣

緊東北至州九十五里

古戴國也春秋隱公十年宋人蔡人衛人伐戴後屬宋

楚滅宋改名曰穀漢以為菑縣國都城記曰

案國都城記見史記

堯本紀注是徐才宗所撰而隋書經籍志但云二卷不著人姓名今附識于此

縣西南有戴

水今名戴陂周迴可百餘里蓋本戴國取此陂水為名

也漢之興也其邑多菑年數不登故邑曰菑章帝柴于

岱宗過菑縣詔御史曰陳留菑縣其稱不令故高祖鄙

柏人之名武帝休聞喜而顯獲嘉其改菑縣為考城縣

元和郡縣志

卷十二

五

至晉屬濟陰郡高齊天保七年省考城縣移成安縣理

此隋開皇十六年仍改名考城縣屬宋州武德五年改

屬曹州

蔡丘在縣東南一百五十步左傳齊桓公會諸侯于葵

丘是也

大劑陂即戴陂也在縣西南四十五里周迴八十七里

與宋州襄邑縣中分為界

濮州

濮陽上

**案**開元元戶四萬六千九百二十一鄉九百十三  
元和戶四萬六千九百二十一鄉九百十三  
鄉數傳寫缺

禹貢兗州之域春秋時爲衛國地左傳齊桓公會諸侯于鄆注曰鄆衛地今東郡鄆城縣也戰國時屬齊在漢爲濟陰郡之鄆城也後漢獻帝于此置兗州晉置濮陽郡後改濮陽國封王子允爲王後爲郡隋開皇十六年于此置濮州大業三年廢濮州入東平郡隋末陷于寇賊武德四年討平王世充于此重置濮州

州境東西北西一百三十五里

八到西南至上都七千九百五十五里

西南至曹州二百一十里

元和郡縣志

卷十二

北至黃河二十里東北至鄆州一百七十里

貢賦開元貢絹二十疋綿二十疋

管縣五

鄆城 雷澤 臨濮 濮陽 范

鄆城縣緊郭下

本漢舊縣屬濟陰郡隋開皇十六年于此置濮州鄆城縣屬焉大業三年廢濮州縣屬東平郡武德四年重置濮州鄆城縣又隸焉

黃河北去縣二十一里

州理城在故鄆城中魏文帝以臨淄侯植爲鄆城侯

雷澤縣

上西北至州九十里

本漢郟陽縣古郟伯國周武王封弟季戴于郟漢以爲縣屬濟陰郡隋開皇六年于此置雷澤縣因縣北雷夏澤爲名也屬濮州

歷山在縣西北十六里史記曰舜耕歷山耕者讓畔

澠水沮水二源俱出縣西北平地去縣十四里

雷夏澤在縣北郭外澠沮二水會同此澤

姚墟在縣東十三里舜生于姚墟

元和郡縣志

卷十二

七

堯母廟在縣西南四里

堯陵在縣西三里自堯卽位至永嘉三年凡二千七百二十一年記于碑貞觀十一年有詔禁人芻牧春秋奠酌

臨濮縣

上北至州六十里

本漢成陽縣地屬濟陰郡隋開皇十六年分鄆城南界雷澤西界置臨濮縣屬濮州南臨濮水故以爲名大業二年廢武德四年重置

清丘在縣西三十五里

濮陽縣

上東至州八十里

本漢舊縣也古昆吾國卽帝丘顓頊之墟也昆吾卽夏諸侯爲五伯之首左傳曰狄滅衛遷于帝丘衛侯自楚丘徙濮陽縣秦置東郡理此漢仍爲東郡及濮陽縣也隋開皇十六年改屬濮州

黃河北去縣十五里

瓠子河上承黃河漢書武帝時河決瓠子東南注鉅野通于淮泗上使汲黯鄭當時興人徒塞之堤復壞是時武安侯田蚡奉邑食郟在河北河決而南則郟無水災

元和郡縣志

卷十二

八

乃言江河之決乃天事也非易以人力塞之乃不復塞後二十餘歲歲比不登梁楚尤甚上使汲人郭昌率卒數萬人塞瓠子決河沈白馬圭璧自將軍以下皆負薪下淇園之竹以爲楗上悼功之不成乃作歌于是卒塞瓠子築宮于其上名曰宣房其後王尊爲東郡太守河水盛溢泛浸瓠子金堤尊躬率吏民沈白馬祀水神親執圭璧使巫策祝請以身填金堤水盛堤壞吏民皆奔走尊立不動而水漸退

范縣

上西南至州六十里



本漢舊縣屬東郡春秋時晉大夫士會之邑也高齊廢  
隋開皇六年又置范縣屬濟州十六年改屬濮州  
故顧城在縣東二十八里夏之顧國也詩曰韋顧既伐  
昆吾夏桀注曰三國黨于桀皆爲湯所誅

密州 高密中

禹貢青州之域兼得徐州之地今州界于春秋之時爲  
莒魯之地戰國時屬齊秦并天下屬琅琊郡漢文帝十  
六年分齊立膠西國都高密宣帝更名高密國後魏永  
安二年分青州立膠州取膠水爲名也隋開皇五年改

元和郡縣志

卷十二

九

膠州爲密州取境之密水爲名也隋亂陷賊武德五年

山東底定改置密州

州境 東西南北三百九十里

八到 西至上都一千八百八十五里  
西至東都一千八百八十五里

東至大海一百八十四里  
南至海州三百八十四里

西南至沂州三百七十里  
西北至青州三百三十里

東北至萊州三百四十五里

貢賦 開元貢  
細布 牛黃 海蛤  
繩布

管縣四

諸城 高密 輔唐 莒

諸城縣 上郭下

本漢東武縣也屬琅琊郡樂府章所謂東武吟者也後漢屬琅琊國晉屬東莞郡後魏屬高密郡隋開皇十八年改東武爲諸城縣取縣西三十里漢故諸縣城爲名琅琊山在縣東南百四十里史記曰始皇二十六年滅齊遂登琅琊作層臺于山上謂之琅琊臺週迴二十里秦王樂之因留三月徙黔首二萬戶于山下後十二年刊石立碑紀秦功德

元和郡縣志

卷十二

十

海在縣東一百五十里

盧水出縣東南盧山水側有勝火木野火燒死其炭不灰故東方朔有謂不灰之木者也

縣理東南百三十里濱海有鹵澤九所煮鹽今古多收其利

澠水故堰在縣東北四十六里蓄以爲塘方二十餘里  
漑水田萬頃

高密縣

上西南至州一百二十里

本漢舊縣也文帝十六年分齊立膠西國封齊悼惠王

子卬爲膠西王都高密世祖封鄧禹爲高密侯高齊文宣帝省高密縣隋開皇中復置屬密州

□在縣東南六十里

濰水在縣西南自諸城縣界流入去縣四十里昔韓信與楚將龍且夾濰水而陣信爲萬餘囊盛沙壅水上流引軍擊龍且陽不勝還走龍且追信信決壅囊水大至龍且軍大半不得渡遂斬龍且

膠水在縣東三十里

夷安澤在縣北二十里周迴四十里多麋鹿蒲葦

元和郡縣志

卷十二

十一

龍且城在縣西南五十五里楚將龍且所築也

鄭玄墓在縣西七十里

輔唐縣

上東南至州二百二十里

本漢安丘縣也屬北海郡後漢屬北海國有渠丘亭故莒渠丘公所居也高齊文宣帝天保七年省隋分昌安縣置牟山縣大業二年改牟山縣爲安丘縣取漢書舊名也屬密州乾元二年改爲輔唐縣

牟山在縣西南十三里牟山縣取名于此

浯水堰三齊記曰昔者堰浯水南入荆水灌田數萬頃

今尚有餘堰而稻田畦畛存焉

莒縣

上東北至州一百九十里

故莒子國也漢爲莒縣文帝二年封朱虛侯章爲城陽王都莒後魏亦以莒縣屬東莞郡隋開皇三年廢郡莒縣屬莒州大業三年罷莒州以莒縣屬琅琊郡武德五年重置莒州縣屬焉貞觀八年廢莒州以縣屬密州濰山在縣東北八十三里濰水所出也

縣理在莒國故城中城三里竝皆崇峻惟南開一門子城方十二里郭周迴四十里

元和郡縣志

卷十二

十二

故曹公城在縣南七十二里昔魏太祖征陶謙拔五城略地東海于此築城周迴四里

漢海曲縣在縣東一百六十里屬琅琊郡有鹽官地有東呂鄉東呂里太公望所出也王莽末海曲縣有呂母者其子爲縣令枉殺乃散財以招少年少年感母恩問母所欲具言之乃共起兵殺縣令其後屯結至數萬赤眉之興由此始也今東海縣有呂母國卽舊集之所也

元和郡縣志卷十二